

BÓKUN 25**UM SAMKEPPNI VARÐANDI KOL OG STÁL****1. gr.**

1. Banna skal alla samninga milli fyrirtækja, ákvarðanir samtaka fyrirtækja og samstilltar aðgerðir hvað varðar sérstakar framleiðsluvörur sem um getur í bókun 14 og haft geta áhrif á viðskipti milli samningsaðila í þá veru að koma í veg fyrir, takmarka eða raska eðlilegri samkeppni, beint eða óbeint, á svæðinu sem samningurinn tekur til, einkum ef með þeim er stefnt í þá átt að:
 - a) binda eða ákvarða verð;
 - b) takmarka eða stýra framleiðslu, tækniþróun eða fjárfestingum;
 - c) skipta mörkuðum, framleiðsluvörum, viðskiptavinum eða birgðaveitum á milli þeirra sem í hlut eiga.
2. Þar til bær eftirlitsstofnun skal, eins og kveðið er á um í 56. gr. samningsins, samt sem áður heimila sérsamninga eða samninga um sameiginleg kaup eða sameiginlega sölu varanna sem um getur í 1. mgr., telji hún að:
 - a) slík sérhæfing eða sameiginleg kaup og sala bæti framleiðslu eða dreifingu þessara vara verulega;
 - b) umræddur samningur sé nauðsynlegur til þess að ná þessum árangri og setji ekki meiri höft en nauðsynleg eru í þeim tilgangi; og
 - c) ekki séu líkur á að samningurinn veiti hlutaðeigandi fyrirtækjum vald til þess að ákvarða verð, eða stýra og hefta framleiðslu og markaðssetningu verulegs hluta umræddra vara á svæðinu sem samningurinn tekur til, eða verndi þau gegn virkri samkeppni annarra fyrirtækja á svæði því sem samningurinn tekur til.

Ef þar til bær eftirlitsstofnun kemst að raun um að ákveðnir samningar eru að öllu leyti hliðstæðir framangreindum samningum, með sérstakri hliðsjón af því að þessi málsgrein á við um dreifingarfyrtækja, skal hún einnig heimila þá þegar fullvíst þykir að þeir uppfylli sömu skilyrði.

3. Samningur eða ákvörðun sem er bönnuð samkvæmt 1. mgr. ógildist sjálfkrafa og er ekki hægt að byggja á þeim fyrir dómstóli eða rétti í aðildarríkjum EB eða EFTA-ríkjunum.

2. gr.

1. Viðskipti eru háð því að þar til bær eftirlitsstofnun veiti leyfi fyrirfram, eins og kveðið er á um í 56. gr. samningsins, með fyrirvara um ákvæði 3. mgr. þessarar greinar, leiði þau beinlínis eða óbeinlínis á svæðinu sem samningur þessi tekur til, sem afleiðing af aðgerðum einstaklings eða fyrirtækis eða hóps einstaklinga eða fyrirtækja, til að samfylking fyrirtækja myndist, þar sem að minnsta kosti eitt þeirra fellur undir 3. gr., sem haft getur áhrif á viðskipti milli samningsaðila, hvort sem viðskiptin varða eina eða fleiri mismunandi vörur og hvort sem áhrifin eru vegna samruna fyrirtækja, kaupa á hlutabréfum eða hlutum í fyrirtæki eða eignum, láns, samnings eða annars konar aðstöðu.
2. Þar til bær eftirlitsstofnun skal, eins og kveðið er á um í 56. gr. samningsins, veita leyfið sem um getur í 1. mgr. ef hún sér fram á að fyrirhuguð viðskipti muni ekki veita hlutaðeigandi einstaklingum eða fyrirtækjum umboð innan lögsögu hennar að því er varðar vöruna eða vörurnar:
 - til þess að ákvarða verð, stýra eða takmarka framleiðslu og dreifingu eða koma í veg fyrir virka samkeppni á stórum hluta markaðarins fyrir þessar vörur; eða
 - til þess að skjóta sér undan samkeppnisreglum sem komið er á í samningnum, einkum með því að koma sér upp óeðlilegri sérréttindastöðu sem hefur í för með sér verulegan ávinning varðandi aðgang að birgðum eða mörkuðum.
3. Flokka viðskipta má undanskilja frá kröfunni um að leyfi sé veitt fyrirfram, með hliðsjón af stærð viðkomandi eigna eða fyrirtækja og tegund samfylkingar.

4. Ef þar til bær eftirlitsstofnun, eins og kveðið er á um í 56. gr. samningsins, kemst að því að opinber fyrirtæki eða einkafyrirtæki, sem hafa eða öðlast, að lögum eða í raun, yfirburðastöðu, varðandi vöru innan lögsögu hennar, sem verndar þau gegn virkri samkeppni á verulegum hluta svæðisins sem samningurinn tekur til, og nota þessa aðstöðu í andstæðum tilgangi við markmið samningsins og slík misnotkun getur haft áhrif á viðskipti milli samningsaðila, skal hún senda þeim viðeigandi tilmæli til þess að koma í veg fyrir að aðstaðan verði notuð á þann hátt.

3. gr.

Að því er varðar 1. og 2. gr. þessarar bókunar og einnig vegna þeirra upplýsinga sem þörf er á vegna beitingar þeirra og málareksturs í tengslum við þær merkir „fyrirtæki“ framleiðslufyrirtæki í kola- og stáliðnaði á svæðinu sem samningur þessi tekur til, og fyrirtæki eða umboð sem fæst reglulega við annars konar dreifingu en sölu til viðskiptavina á heimamarkaði og handverksfyrirtækja.

4. gr.

Í XIV. viðauka við samninginn eru sérákvæði til framkvæmdar þeim meginreglum sem settar eru fram í 1. og 2. gr.

5. gr.

Eftirlitsstofnun EFTA og framkvæmdastjórn EB skulu tryggja beitingu þeirra meginreglna sem mælt er fyrir um í 1. og 2. gr. þessarar bókunar í samræmi við ákvæði um framkvæmd á 1. og 2. gr. í bókun 21 og XIV. viðauka við samninginn.

6. gr.

Ákvarðanir um einstök mál sem um getur í 1. og 2. gr. þessarar bókunar skulu teknar af framkvæmdastjórn EB eða eftirlitsstofnun EFTA í samræmi við 56. gr. samningsins.

7. gr.

Með það fyrir augum að þróa og viðhalda samræmdu eftirliti á Evrópska efnahagssvæðinu á sviði samkeppni og stuðla að einsleitri framkvæmd, beitingu og túlkun ákvæða þessa samnings í þessum tilgangi, skulu lögbær yfirvöld vinna saman í samræmi við ákvæðin sem sett eru í bókun 23.